

## A LA MIGA AIMADA

Ò la mèva polida flor,  
Ò bèl tresaur, migòta aimada,  
Se't deishas fèr un doç poton,  
Tu, que siràs mon adorada.

Tot cantarà, tot sirà bèl,  
Tindaràn fòrt, claras esquelas  
E jucas al pregond del cèl,  
Reluseràn blancas estelas.

Volaràn mès les auselons  
A la frescor de la ramada.  
Sautaràn mès les anhelons  
Tot reguitnant aishús la prada.

Dijós l'solelh, las ròsas flors  
Tremolejan a la ventada,  
Tot suau faràn escotons  
En plorant lermas de rosada.

E jo, content, reviscolat,  
Totas dolors apasegadas,  
Que'n farè retronir Massat  
De mas cançons enamoradas.